

# Atham woThiththoc Atham ammakka oPoluc pokurrinet oThiththoc **Lon lonothon**

OThiththoc pokat pakannoka ponoul woIouth anaruk kwocokathe lon loMiccie kwothakkakathe pul ipittarotho oPoluc iire ngung. Ittina oPoluc pothiathe oThiththoc akwothongkene ul ioccotho lon loKapik noththok poKrit.

OPoluc pi'rekatho oThiththoc itti kwangkene ul ittittik ana ul iari ana u'rit ana iak. Ana ocothot p'rin oPoluc pi'rekatho oThiththoc itti ul iamakot oMiccie wakkot tat ana kannan itti okin thaka ul iana thomicco ana 'ra th'raro ana tha'retto.

## **Lon ilaik iatham**

1. Thomicco (1.1-4)
2. Ul ittittik iakkot ngre ngoKapik (1.5-16)
3. Thikkoik thoul ioccotho lon loMiccie (2.1-15)
4. Thongkene ana lon lotha'rettako nan (3.1-11)
5. Lon ilocotho (3.12-15)

<sup>1</sup> Oun oPoluc iparekine Kapik ana pul pothothilettat poIeccuo ipaleccuo oMiccie pothiothe anothittarot ul iaKapik kakkarothe thocokot lon nomikit ana ongenekin akin ina lon ilaik icat loKapik ilakorrno kin akin ikkoik thoporot. <sup>2</sup> Akin ona lon nomikit lothikkoik thotheput thuput ila Kapik ki'ret ngngin icat

nci ma'rot ana kakarrnnammikkot. <sup>3</sup> Ana noca'ri icaKapik konekketheik, kwokenet lon lung ila mperenet ul appik ila Kapik kotho'ret thonnon ki'rethin itti mpakkot. <sup>4</sup> Mpakurrinung oThiththoc oung ukul win icaricat akka orit aththe'ra thoccokothe lon loleccuo nomikit lulukku. AKapik oNgappa ana oMiccie oIeccuo potho'ret thonnon ethet non thoporot ana thomicco thung.

*Ngre ngoThiththoc noththok poKkrit*

<sup>5</sup> Lon ila mpoththenet naung noththok poKkrit itti athettot lon cik ilakorronno omarttako ana anekkekat ul ittittik woul cik appik noul ioc-cokothe lon loleccuo na'ran appik, ammakka mpi'rehung. <sup>6</sup> Pul iprik pen iponu lon ikkun itti pella thorukwettat cik llon ilokithak ana apona pari pulukku ana nyukul nyung nyonu itti nyakorronno oka nyanyarot cik nuthuk ana nyonu itti nyaccikot lon lung. <sup>7</sup> Pul iponu ul ioc-cokothe lon loleccuo pen ponu itti pella thorukwettat cik llon ilokithak akka ook pul iparekine Kapik. Kwonu itti kwakarrnnipot ka thoura ana okorronno ua ka cokocokot ana okirrnnikko ngapak ngoppot ana okkot thukungun ana ona no're nakucci. <sup>8</sup> Kwonu itti kwaka pul ipongothe ul itti wainok ana ongat lon appik iloporot ana oka pul ipac-cokot ka nti ilon ilokithak ana ipinaik nti ica ana oka poco'rothe lon cik ana oka pupupure. <sup>9</sup> Kwonu itti kwaccokot ana o'rumo nolon ilaik icat loleccuo ammakka kwongkenettat othakka itti akwittarot opilingon nthongkene thoporot ana okene okkwion ithaik tha'retto nolon loleccuo.

<sup>10</sup> Akka ul waik woppot i'rat ommakot lon lothongkene ithoco'rotheik. Akka ul waik woppot iere ngkara ana ammikkot okin anganna ithokekkothe. <sup>11</sup> Okin thonu itti okin thangkiet-taik akka okin thaik thakittine ul woruan lon nomiküt, akin ongkene thongkene ithonu itti thakorronno ongkenetta ana ilen akka akin iot akucci ngngin. <sup>12</sup> Opilin manna nti iakin ul woKkrit pothernte lon lokapik pi'ret itti, "Ul wonoka'ran koKkrit appik wonu karra okin thikkoik ere a'rupu worikira ionu ngore ana wongothe itti wa'rkoik aththakat tulluk." <sup>13</sup> Lon len elli laik icat. Ana ittina othirriethekin cik llon lonthoththomat, othakka itti akin o'rumo nolon loleccuo nomiküt. <sup>14</sup> Ana okorronno okkwine lon lokerung koul woIouth unu ncik ana lon loul ionyi i'rat occikot lon ilaik icat. <sup>15</sup> Ul iupupure nomiküt wimma a'rupu appik woporot. Anaruk ul iokithak nomiküt ana okorronno oc-cokot lon nomiküt loleccuo wimma a'rupu appik wokithak akka ngu'ru ingaik ima ana nomiküt nga'rumot a'rupu appik ioporot. <sup>16</sup> Ul ammakka wen winnikot itti wina Kapik anaruk thikkoik then thakene itti okin thomma Kapik. Okin thaul w'rat ana okin thakorronno occikot lon loKapik ana linakot itti okin thakarrnekkko nan itti okin thakkot lon iloporot appik.

## 2

### *Thongkene ul mungkut kurekkurek*

<sup>1</sup> Anaruk oung oThiththoc, ongkene thongkene ithoco'rotheik ana ithamakot lon loMiccie.

<sup>2</sup> Erenet ul iocokkat iomura itti akin angwot

ka ken papenang ana oka thothiakinēt cik ana oka thinaik nti ima ana thopo'rat than nthocokot lon loKapik nomikīt men ana okkot ngre appik nthongarot nomikīt ana thocokot cikīt. <sup>3</sup> Menik cakuruk nongkene ul iari iocokkat itti akin ikkoik thikkoik ithakene itti okin thaik thamakot lon loKapik, akin okorronno onyaro akin eret ul llon ilokithak ana akin okorronno othakka iak wongapak. Okin thonu itti okin thaka ul iangkene lon iloporot, <sup>4</sup> othakka itti akin ocimitto nyukul inyoire inyonan akin ongat ollen ana nyukul nyen, <sup>5</sup> akin angwot ka ana oka thupupure ana akin okatha lon lokaman ken ana oka thoporot ana occikot lon lollen othakka itti apul ella ipere lon lokithak nolon loKapik.

<sup>6</sup> Ana cakuruk nerene u'rit akin angwot ka ken oka thinaik nti ima. <sup>7</sup> Ilon appik ngkwonu itti ngkwaka pul ipaul onneko lon nan iloporot. Oka pul ipere lon icat ana oka pothiakinēt cik amma angkene lon ilella lon tit ilokithak. <sup>8</sup> Amma ere aere lon iloco'rotheik ana loporot ilaul ongat othakka itti aul i'rat lon lang othiaik akin okorronno iot lon l'rek ilokithak ilakin eret ton ngngin.

<sup>9</sup> Ana nongkene iak itti waccikot opingon ana okkot lon ila opingon thongothe itti okin thakkinthet kin appik ana okorronno 'ranekin lon. <sup>10</sup> Ana okorronno omunyet opingon. Anaruk akin okenekin itti okin thoporot lon ncik appik ana manna okin thettat a'rupu ikkun wopingon ittina okin thakorrrno ul angkat lon loKapik kotho'ret thonnon.

<sup>11</sup> Akka Kapik kokenet thoporot thung

ithanane ul tho'ret appik. <sup>12</sup> Ana thoporot thoKapik thakeneron itti oron th'ra lon ilakorronno opirie Kapik noka ana 'ra lon lonocapu ncik appik, ana thakeneron tat akka oron inaik nti ima papenang ana oka thoco'rothe lon cik ana ikkoik thikkoik itha Kapik kongothe, <sup>13</sup> ana inakka oron thaik tha'rikot ca'ri icoporot, ca'ri cothirik thoIeccuo oMiccie ook ipa Kapik konnon ikirik ana potho'ret thonnon ummot ncik nan. <sup>14</sup> Okkwiot itti akwelikkoron nti ilon iokithak ana akwothikkieron tho'rillir ana akwothikkieron ul wung iongothe okkot lon ilapirie Kapik noka.

<sup>15</sup> Ongkenekin ana omereket kin ana othirriet kin cik ngili ngang ana okorronno okorronno opilin p'rek itti kwaccirong nngin.

### 3

#### *Okkot lon iloporot*

<sup>1</sup> Okwarikiethe ul ioccoke the lon loIeccuo accikot lon lonili ana ul ionu ngili ikkun, akin occikot lon ana ongat itti okin thakkot lon iloporot. <sup>2</sup> I'rethekin akin okorronno eret lon ilokithak ana okorronno a'retto, anaruk akin oka thoporot lon noul appik ana okenekin itti okin thongothe ul appik.

<sup>3</sup> Oron manna thokat ca'ri c'rek thommaik nti ima ana thakorronno occikot lon ana amikkikkakot, ana oron thokat unomakot lon loka konnon ana ongat lon ilapirietto noka. Thikkoik thonnon thokat thoppathe lon lulluk lothonyira, ana thokat th'rat ul ana w'rat ton. <sup>4</sup> Anaruk akka thiak nocikit thoKapik kotho'ret ton ana thongat

thung thummothe ncik, <sup>5</sup> ko'rekatheron annoka itti nti ire ng'rek ioporot ingaron thokkothe, anaruk nti thiak thung. Kwimetheron ngu'ru iokithak ana ethet ton thikkoik ithie ngKanang ikupupure, <sup>6</sup> ika kwethet ton nuthuk ngk'ran koleccuo oMiccie potho'ret thonnon. <sup>7</sup> Kapik kothikkiet ton thoporot nti ithiak thung. Ana menik inenni oron thina itti oron thana tho'rikot cik nomikït thothikkoik thupuththuput.

<sup>8</sup> Lon elli ila mpi'ret laik icat ana mpongothe itti ngkwaccot kit nan othakka itti okkwion ithoc-cokothe lon loKapik nomikït men akin okkot lon iloporot. Elli akkittarot ul.

<sup>9</sup> Anaruk nopa'rine lon cik lothopllarot tho'ran wothiki ana tha'rettot nolon lothonce'ret lon cik loul wolouth akka lella lon cik ana lakannit-tararot. <sup>10</sup> A'retti nakkwi ipillillo iul akenek ma'ri me'ra ittina antopa'rinok cik. <sup>11</sup> Pul ipammakka empi popa'rot cik nti ilon loKapik ilaik icat, kwaik pakkot ngu'ru iokithak ana ittina kwi'rikikkot calak cung.

### *Thocimitto ana thomicco*

<sup>12</sup> Amma mpothinthung Arththimac ana manna oThikikkoc, ainin accokkot noka'ran ikoccot k'ran itti Nikkoppolic akka mpi'ret itti mpathikkoik tentre icapo. <sup>13</sup> Ittarothe oCinac pul pothonce'ret lon cik ana Apolloc nokathar ana okatha itti okin thouu a'rupu iakin thongothe. <sup>14</sup> Ul wonnon wonu itti wina itti okin thakkot lon iloporot othakka itti akin iot a'rupu iakin thongothe ana okorronno oka ul ikkoik nuthuk.

<sup>15</sup> P'prak ipanin thaik inaththungon paik pam-iccong. Omicci opang ponnongon iparon thaik

ithocokot lon loKapik nomikıt thulukku. Atho-  
porot thoKapik oka nanon appik.

**Lumun**  
**Lumun: Lumun (Bible)**

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.  
All rights reserved.

2020-11-18

---

PDF generated using Haiola and XeLaTeX on 23 Aug 2023 from source  
files dated 29 Jan 2022

b9cb69ce-3694-5d9f-bda5-4a2243fae